

Nuuk 30.12.2021

Kingumunaasit ukioq naagujoq

Ukioq 2021 pisoqarfiusimaqisoq qaangiutilerpoq. Tassa ukiormanna kikkut tamak oqartussaaqataanerat aqqani ataatsimeersuarnerput ingerlapparput, taamatullu siulersuisuunernut nutaanik arlalinnik ilaasortanngortoqarpoq, periarfissarlu iluatsillugu siulersuisuunitoqqat uani aamma pissusissamisoorpoq qutsavigissallugit.

Aammattaaq ukiormanna Inatsisartunut ilaasortaattassatsinnik qinersivugut, miserratiginagulu oqaatigissavara Inatsisartunut qinersinerup inernera naammagisimaannginnakku, kisianni tassa Demokratii taamaappoq, qinersinerullu inernera soorunami ataqqivara. taamaattoq neriuutigisimagaluarpara aatsitassarsiorneq sukkanerusumik ingerlanneqarsinnaalerumaartoq, Inatsisartullu tassa massakut aaliangerput aatsitassarsiortoqarsinnaanngitsoq aatsitassarsiorfissaq 100 ppm-mmi sinnerlugu akoqarpat, tassa 0,003.

Tamatumalu kinunerisisaanik ilimageriikkattut aatsitassarsiorniat arlaqartut taamaatillutik oqariatuuteqareerput, tamannalu uanga ajuusaarnartutut isigaara, tassami maannakut maani nunami aningaasat amerlanerungaartut pisariaqartippagut, ilaasortatta aningaasarsiaat aamma annertunerusumik qaffaaffigineqassappata, tassami pisortanut isumaqatigiinniarluta aallartikkaluarpugut aajalusoorluta, annertunerusuminngooq qaffaaffigissalluata akissaqannginnamik, tassalu taamaattuassaaq maani nunami aningaasat amerlanerusut kaavilukaartinneqalinngippata, taamaattuminguna ilungersuutigisimagaluaripput soorlu kuannersuit aatsitassarsiorfittut ammarneqarnissaat, ilaasortatta atugarissaarnerulernissaat anguniarlugu.

Ukiormanna aammattaaq aaliangertoqarpoq qaammatikkaartumik qaleralittaassiisarneq aappaagumiik atorunnaarsinneqassasoq, tamannalu ernumanermik annertuumik pilersitsivoq, tassami siusinnerusukkut misillitagaqarfigipiloreerparput ukiumut pisassiisarneq, tassami taamaattoqartillugu august aallartigalinnartoq qaleralittassat nungunneqartarmata, taamaasineranilu ilaasortagut aalisakkerivinni angerlartinneqaannartarlutik, tamannaluuna pinngitsoortinniarlugu qaammatikkaartumik pisassiisarneq eqqunneqartoq, ilaatigut ilaasortagut aalisakkerivinni sulisut ukioq kaavillallugu sulisinnaaniassammata.

Maanakkut ernumatigaara juli aallartilaaginnartoq qaleralittassat nungussasut, tassami qangamut sanilliullugu qaleralinniat maannakut amerlaneroqimmata.

Taamaattumik ukioq 2022 qularnanngilaq unamminartorpassuarnik pisoqarfiugumaartoq, siullermik ernumatigaara aningaasat nunatta Karsianut isertartut milleriassasut, taamaattoq neriuuteqalaaraluarpunga mittarfiliorerup aningaasat isaasut aalaakaatissagai, kisianni tassa mittaarfiiit naammassippaata aningaasat isaasut milleriangaatiassapput aningaasanik nutaanik isaatitsiviusinnaasunik pilersitsisoqanngippat.

Ukiumilu qaangiutilersumi suleqatigiinnitsinnut pitsaasumut qujallunga neriuutigaara ukioq 2022 suleqatigiiffiulluarumaartut, tassami uagit atasimik siunnerfeqarluta ingerlatsinngikkutta assigiinnarmagu timmiarsiummik sumut tamanut tamaanga eqqarutta.

Ukiumut qaangiutilersumut qujallunga ukiumut nutaanut iserluarnissassinnik tamassinnut kissaassivunga, qanortorlu ukioq 2022 tamatsinnut angusaqarfiulluarili minnerunngitsumik ilaasortarpassuartinntu.

Kattuffiup siulittaasua

Jess G Berthelsen